

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO


haber

BESPLATAN PRIMJERAK ● SEPTEMBAR, 2017. broj 35.



**Nastavljen trend
rasta i razvoja i
u 2017. godini**

- 2-3 Polugodišnji press o rezultatima rada Općine
- 4 Otvoren Centar za zdravo starenje
- 5 Izgrađeno novo igralište "Pčelica"
- 8-15 Komunalni projekti
- 16-17 Obrazovanje i sport
- 18 Posjeta konjičkom klubu "Hidalgo"
- 19 Hadži-Sinanova tekija



Impressum

Izdavač: Općina Stari Grad Sarajevo
Tiraž: 2.000
Pripremili: Almedina Porča
Alma Imamović
Nedim Šahović
DTP: Safet Mališević
Fotografije: Safet Mališević
Štampa: "Pentagram" d.o.o.
Adresa: Zelenih beretki br. 4
71000 Sarajevo
web: www.starigrad.ba
e-mail: info@starigrad.ba
Tel./fax: +387 33 282 385
+387 33 217 916



Aktuelnosti



Općina Stari Grad nastavila trend uspješnog rada i kroz 2017. godinu

Izgradnja novih objekata, terena i igrališta ● Uklanjanje ruševnih objekata i preventivno djelovanje ● Postoje ideje za bazene na Bentbaši ● Odobren kredit Saudijskog fonda za razvoj

Početkom jula u Općini Stari Grad održana je press konferencija na kojoj je načelnik Ibrahim Hadžibajrić predstavio rezultate rada općine u prvih šest mjeseci. Kroz video prezentaciju prikazani su projekti koji su realizovani u proteklih pola godine ili je njihova realizacija počela ranije, a finalizirana u navedenom periodu.

Nova igrališta i tereni na Sedreniku, Moščanici, Vratniku...

Početkom godine svečano su otvorena dva nova objekta: sportska sala u OŠ "Mula Mustafa Bašeskija" i aneks

objekta OŠ "Vrhbosna", a ubrzo nakon toga građani Starog Grada dobili su na korištenje i četiri nova dječija igrališta – na Sedreniku, Moščanici, Vratniku i Bistriku. Ovaj trend će se nastaviti, pa će do kraja godine biti izgrađen moderni sportski teren na Mihrovodama vrijedan preko 100.000 KM, a finansirat će ga pobratimska turska općina Fatih.

Kako je kazao Hadžibajrić, u izgradnje novih objekata i terena, ulica i zidova, opremanje službi zaštite i spašavanja, preventivne mjere, podršku školskim ustanovama i NVO-ima, te boračkoj populaciji i socijalno ugroženim, za prvih pola godine uloženo je preko 3,5 miliona KM.



Pušina i Hadžibajrić govorili o realizovanim projektima

„Samo u projekte iz oblasti infrastrukture uložili smo oko 1,2 miliona KM. Rekonstruisali smo i asfaltirali neke od najvećih i najprometnijih ulica, te nastavili rekonstrukcije vodovodne i kanalizacione mreže. Počeli smo uklanjanje ruševnih objekata što je predstavljalo veliki problem u ovoj općini zbog komplikacija sa imovinsko-pravnim odnosima, ali i to se polako rješava. Posebno bih naglasio važnost čišćenja i uređenja korita. Djelujemo preventivno, a ne kada dođe do poplava. Jako je važno očistiti korita rijeka i potoka, kao što smo uradili na Čolinom i Bistričkom potoku, da ne bi došlo do poplava kada krenu padavine,“ kazao je Hadžibajrić.

Učešće u projektima od javnog interesa za Sarajevo

Hadžibajrić je govorio i o projektima u koje je Općina Stari Grad uključena, a koji su od javnog interesa za Grad Sarajevo.



Sportska sala u Logavinoj

„Za Trebevičku žičaru smo urbanističku dozvolu izdali još 2014. godine, a zbog izmjena planova izdavali smo ih i narednih godina. Sada radimo eksproprijaciju zemljišta i to je u završnoj fazi. Sve što Gradska uprava u tom smislu od nas zatraži mi završavamo i prije roka i tako ćemo i ubuduće. Ako je rok 30 dana, naše službe izdaju dozvole za sedam,“ kazao je Hadžibajrić.

Hadžibajrić je odgovarajući na novinarsko pitanje o planovima za bazen na Bentbaši kazao da Općina neće graditi bazene iz budžetskih sredstava jer ta investicija ne bi bila održiva i bazen bi vje-

Izgradnja hotela na mjestu Feroelektra

Novinarima je bila interesantna i tema izgradnje hotela Hilton na mjestu bivšeg objekta Feroelektra. „Općina je za 3 miliona i 6 hiljada KM prodala svoj dio Fatihu Kolu, koji je ostatak objekta otkupio od privatnog lica, te investirao u uklanjanje ruševine. Procjene su da je dosad uložio više od pet miliona maraka, a što se tiče izgradnje hotela, mi smo izdali urbanističku dozvolu i izdat ćemo i građevinsku i taj postupak je u toku. Kol je investitor i na sva pitanja o izgradnji hotela može samo on odgovoriti,“ pojasnio je Hadžibajrić.



Lamela II OŠ "Vrhbosna"



Safvet-bega Bašagića

rovatno poslovao s gubicima s obzirom na trajanje sezone kupanja, kao i sve druge faktore. Umjesto toga, postoji mogućnost iznalaženja investitora. „Razgovarao sam sa određenim investitorima iz Austrije koji su spremni da uđu u taj projekat. Oni bi uložili sredstva i ponovo otvorili bazen na Bentbaši, a zauzvrat bi im Općina dala bazen na korištenje u narednim godinama. Vidjet ćemo kako će se Općinsko vijeće izjasniti o tome,“ kazao je Hadžibajrić.

Sanacija klizišta do kraja godine

Na kraju press konferencije Hadžibajrić je potvrdio da je dobio potvrde kako je Saudijski fond za razvoj odobrio Općini Stari Grad kreditna sredstva u iznosu od oko 13 miliona maraka, te da su u momentu apliciranja za kredit ona bila namijenjena za izgradnju sportske sale OŠ "Edhem Mulabdić", nadogradnje objekta Doma zdravlja Stari Grad, 'utopljanje' zgrade Općine Stari Grad i izgradnju podzemne garaže u ulici Šahinagića. Ranije je potvrdio da je završena sva potrebna projektno-tehnička dokumentacija, izdata je urbanistička dozvola, a u toku je izdavanje građevinske dozvole za salu OŠ "Edhem Mulabdić".

Do kraja godine, između ostalog, najavljena je sanacija klizišta Sedrenik 138-146, Sedrenik 56, Močila 45 i Nadlipe čikma 23, te drugi projekti.

Projekti

Otvoren Centar za zdravo starenje

Zajednički projekat općina Centar i Stari Grad • Centar za osobe treće životne dobi iz obje općine • Održavanje zdravstvenih programa, radionica, izleta..

Potpisivanjem Ugovora o saradnji sa Udruženjem „Partnerstvo za javno zdravlje“, načelnici Ibrahim Hadžibajrić i Nedžad Ajnadžić zvanično su otvorili Centar za zdravo starenje u ulici Muhameda Kantardžića 3 (zgrada Svjetlosti).

Centar za zdravo starenje, gdje je i potpisan ugovor, smješten je na granici dvije općine, što daje dodatnu simboliku, jer je namijenjen za osobe treće životne dobi obje sarajevske općine. Početak ovog značajnog projekta bio je u martu ove godine, kada su načelnici Hadžibajrić i Ajnadžić potpisali Memorandum o saradnji, nakon čega je urađena sanacija prostora i prilagođavanje novoj namjeni.

U Starom Gradu već djeluje Centar za promociju zdravlja

Načelnik Hadžibajrić je većinu zasluga pripisao Općini Centar i načelniku Ajnadžiću: „Ovo je zasluga Općine Centar jer troškovi i prostor pripadaju njihovoj Općini. Općina Stari Grad se uključila u projekat iznosom od 20.000 KM do kraja ove godine za razne aktivnosti, a u rad ovog Centra ćemo uključiti i naš Centar za promociju i unapređenje zdravlja“. Naime polovinom ove godine, u saradnji sa Udruženjem „Generacija“, Općina Stari Grad je u ulici Obala Kulina bana 22 otvorila centar za sve građane Sarajeva koji već ima izuzetne rezultate. Aktivnosti su zasnivane na raznim zdravstvenim i fizioterapeutskim programima, koji će sada biti dostupni i u novom Centru za zdravo starenje.

U zajedničkom centru Općina Stari Grad će finansirati pružanje usluga koordinatora



Hadžibajrić, Ajnadžić i Bašić-Čatić potpisali ugovor o saradnji

projekta osobama treće životne dobi, rad kuhinje, brigu o manje pokretnim osobama, održavanje izleta, obezbjeđenje materijala za radionice, obilježavanje bitnih datuma i vjerskih praznika i ostale zabavne aktivnosti.

Centar za dobrobit svih građana

Načelnik Općine Centar Nedžad Ajnadžić je izrazio zadovoljstvo zbog odlične saradnje dvije administracije za dobrobit svojih građana: „Ovaj centar je dobra priča i pokazatelj da se može raditi zajedno za dobrobit svih onih koji imaju interes da koriste ovaj centar u svoje slobodno vrijeme. Zahvaljujem se Hadžibajriću i njegovoj administraciji jer smo lagano našli rješenje za sve probleme i nadam se da će u perspektivi ovaj centar zapravo odgovoriti svojoj funkciji“.

Udruženje „Generacija“ realizovat će

u ovom Centru zdravstvene programe, a kao najavu svojih aktivnosti, na svečanom otvaranju korisnicima su podijelili aparate za mjerenje glukoze u krvi. Implementator projekta u Centru je udruženje "Partnerstvo za javno zdravlje" u ime kojeg je sa načelnicima ugovor potpisala Sejdefa Bašić - Čatić

Brojne aktivnosti u Centru

Udruženje „Partnerstvo za javno zdravlje“ implementator je projekata u Centru, a ugovor sa načelnicima Hadžibajrićem i Ajnadžićem potpisala je direktorica udruženja Sejdefa Bašić-Čatić. Ona je najavila brojne aktivnosti: preventivno-korektivnu gimnastiku, kurseve engleskog i njemačkog jezika, obuku za rad na računaru, likovnu sekciju, horsko pjevanje, sekciju turskog veza...



Korisnici dobili glukometre



Sa svečanog otvaranja



Besplatni aparati za mjerenje šećera u krvi



Njemački srednjoškcolci izgradili igralište na Vratniku

Srednjoškcolci prikupili 15.000 eura i izgradili igralište • Projekat izradila firma 'KuKuk - Kultur e.v.' iz Štutgarta

• Učenicima ekskurziju proveli radno

Vrtić „Pčelica“ dobio je novo dječije igralište izgrađeno po modernim standardima, sa drvenim mobilijarom i na zemljanoj podlozi. Tridesetak polaznika ovog vrtića sada može uživati u dječijim igrama na penjalicama, klackalicama, ljuljačkama, pješćaniku... Ovo igralište poklonili su im srednjoškcolci iz Njemačke koji su umjesto odlaska na ekskurziju odlučili da dođu u Sarajevo i za svega sedam dana naprave potpuno novo igralište. Ono što su ranije učili na časovima tehničkog odgoja, sa svojim nastavnicima primijenili su na terenu, a koliko su bili uspješni u ovom poslu najbolje su potvrdila sretna lica djece iz vrtića. Osim volonterskog rada, ovi vrijedni srednjoškcolci su sa svo-

jim roditeljima prikupili i sredstva u iznosu od 15.000 eura potrebna za realizaciju projekta, drvo, materijale, transport...

Ovim igralištem dali ste svoje srce Sarajevu - poručio Pušina

Jedna od učenica, Laura Vinagre kaže da su pokušali djeci napraviti mjesto za igru i da su uživali u tome. Nije joj žao što je ovako provela ekskurziju. „Za mene je ovo bila prava ekskurzija. Bila sam sa svojim drugarima i nastavnicima i zajedno smo radili, a to mi je jednako pričinjalo zadovoljstvo kao da smo bili na ekskurziji“, kazala je Laura.

Učenicima i njihovim nastavnicima u ime Općine Stari Grad zahvalio se predsjedavajući Općinskog vijeća, dr Jusuf Pušina. „Vi ste ovim igralištem dali svoje srce Sarajevu, a Sarajevo i Stari Grad su vas primili u svoje srce. Zahvaljujem vam se na svemu što ste učinili

za našu djecu, a zahvalnost dugujemo i vašim nastavnicima i firmi KuKuk Kultur iz Štutgarta koja je dala ogroman doprinos. Možemo reći da je od sada Štuttgart naš bratski grad“, kazao je Pušina.

A, upravo KuKuk –Kultur e.v. je mjesto gdje učenici iz cijele Njemačke mogu iznijeti svoje ideje, razmijeniti iskustva i opredijeliti se za ovakav vid volontiranja. Saradnja je ostvarena putem općinskog Sektora za lokalni razvoj, a šefica sektora Selma Velić kaže da su njihov prijedlog u Njemačkoj prihvatili bez puno razmišljanja.

„Firma 'KuKuk –Kultur e.v.' poznata je po izgradnji ekoloških igrališta širom svijeta, te smo tragom tih saznanja poslali prijedlog za saradnju. Odmah su prihvatili našu ideju, i kao što vidite veoma brzo ona je realizovana, na zadovoljstvo svih nas, a najviše mališana iz vrtića,“ kazala je Velić.

Sarajlije se 'odužile' na svoj način

Građani koji žive u blizini igrališta kazali su da je lijepo vidjeti ovako mlade ljude koji su toliko vrijedni i predani poslu. Roditelji djece koja su polaznici vrtića organizovali su zakusku uz sokove i tortu povodom završetka radova. Ovaj plemeniti čin učenika oduševio je mnoge, tako da ih je jednog radnog dana besplatnim ručkom iznenadila ašćinica ASDŽ, a počašćeni su i tučanom kahvom iz Dibeka.



Učenicima izgradili igralište za sedam dana



Igralište ima drveni mobilijar

Općinsko vijeće

8. sjednica

Općinskog vijeća

Osma redovna sjednica Općinskog vijeća Stari Grad Sarajevo održana je 27. juna, a na dnevnom redu je bilo svega pet tačaka, s obzirom da su povučene tačke: Izbori i imenovanje i Prijedlog odluke o izmjenama i dopunama Odluke o dodjeli u zakup poslovnih zgrada i poslovnih prostora Općine Stari Grad i rasporedu poslovnih djelatnosti na području općine Stari Grad Sarajevo.

Usvojeni su svi prijedlozi odluka iz oblasti poslovnih prostora:

- a) Prijedlog Odluke o dodjeli u zakup poslovnog prostora u ulici Đulagina čikma broj 18



Samo pet tačaka dnevnog reda

- b) Prijedlog Odluke o dodjeli u zakup poslovnog prostora u ulici Sime Milutinovića broj 4
- c) Prijedlog Odluke o dodjeli u zakup poslovnog prostora u ulici M.M.Bašeskije broj 65
- d) Prijedlog Saglasnosti Općinskom

načelniku za neposrednu dodjelu – prenos prava zakupa poslovnog prostora u ulici Logavina broj 35

- e) Prijedlog Saglasnosti Općinskom načelniku za neposrednu dodjelu – prenos prava zakupa poslovnog prostora u ulici Telali broj 10
- f) Prijedlog Saglasnosti Općinskom načelniku za neposrednu dodjelu – prenos prava zakupa poslovnog prostora u ulici Ćumurija broj 6
- g) Prijedlog Odluke o korištenju poslovnog prostora u ulici Ćurčiluk mali broj 7, kao vlastito učešće po osnovu ugovora o poslovno – tehničkoj saradnji.

9. sjednica

Općinskog vijeća

Na devetoj sjednici Općinskog vijeća Stari Grad vijećnici su, na zahtjev Ministarstva saobraćaja KS, dali saglasnost da se uđe u proces dobijanja kreditnih sredstava za razvoj lokalnih cesta. Kompletan proces bi vodilo Federalno ministarstvo saobraćaja i komunikacija, i to u ime svih kantonalnih direkcija za puteve i općine na području FBiH.

Na sjednici je bilo dosta govora o tački 6. Prijedlogu Odluke o kreditnom zaduženju Općine Stari Grad, koja je na kraju rasprave većinom glasova prihvaćena. Kao razlog zaduženja navedeno je „utopljanje“ zgrade Općine Stari Grad, čime bi se napravile ogromne uštede, čak i do 150.000 KM godišnje. Taj kredit je ponuđen od strane Revolving fonda Fonda za zaštitu okoliša, po veoma povoljnim uslovima, a bit će realizovan posredstvom Union banke. Općina će se kreditno zadužiti na iznos od 999.180 KM,

rok otplate je sedam godina uz grace period od 12 mjeseci i kamatnu stopu od 2%.

Ukupan trošak po kreditu, s kamatom i obradom iznositi će 1.091.136,60 KM.

Općina će kreditna sredstva utrošiti na zamjenu stolarije, zamjenu rasvjetnih tijela, fasaderske, izolaterske i limarske radove,



Data saglasnost za kreditna sredstva

rekonstrukciju ravnog krova, balansiranje sistema grijanja. Prema najavama iz Sektora za lokalni razvoj koji je pripremao aplikaciju za ovaj kredit, nakon potpisivanja ugovora o kreditnom zaduživanju Općina će raspisati tender za izbor izvođača radova.

Općinski vijećnici su kod usvajanja ove tačke tražili i pojašnjenje oko kredita Saudijskog fonda, koji je nedavno odobren. Taj kredit je namijenjen za važne projekte u općini Stari Grad, pa se Općinsko vijeće složilo da on ne smije doći u pitanje. Pojašnjeno je da je kredit revolving fonda povoljniji i njegova realizacija će biti brža. Općina može odustati od kredita Saudijskog fonda za ovaj konkretni projekat, te eventualno ta sredstva usmjeriti na drugi projekat ili se uopće ne zaduživati za taj iznos. U svakom slučaju, ostali projekti namijenjeni za kreditiranje iz sredstava Saudijskog fonda neće biti ugroženi.

Održana izložba islamske kaligrafije Mirsada Smajovića

Predsjedavajući Općinskog vijeća Stari Grad Jusuf Pušina, njegovi zamjenici Irfan Čengić i Sanel Dragolovčanin, te vijećnici Ekrem Kaljanac i Muamer Mekić posjetili su izložbu istaknutog kaligrafa iz Sarajeva Mirsada Smajovića Mirze.

Riječ je o izložbi pod nazivom „EXHIBITION“ koja je do sredine septembra bila postavljena u Morića hanu. Prilikom posjete Smajović je predsjedavajućem Pušini uručio levhu u znak zahvalnosti za podršku u radu.



Islamsko-arapska kaligrafija



Smajović uručio levhu Pušini

Predstavljena nova mobilna aplikacija „Guide2Sarajevo“



Općina Stari Grad i Udruženje „Čuvari tradicije“ predstavili su sredinom jula mobilnu aplikaciju „Guide2Sarajevo“. Riječ je o novom turističkom proizvodu i aplikaciji koja, osim vizuelnog prikaza, nudi i audio vodič za više od 60 objekata od kulturno-historijskog značaja za Sarajevo. Aplikacija je u prvom mjesecu imala preko 2500 preuzimanja, a od sredine septembra postala je dostupna i za korisnike Apple mobilnih uređaja.

„Guide2Sarajevo“ omogućava domaćim i stranim turistima da samostalno upoznaju sve turističke atrakcije Starog Grada i Sarajeva, a prati je i elektronska mapa Sarajeva, koja sadrži i navigaciju.

Obogatiti turističku ponudu

Općina Stari Grad je s ovakvim projektima počela prije nekoliko godina, kada je predstavila prve virtualne vodiče. „Odlučili smo da napravimo korak naprijed i predstavimo jedan novi i savremeniji pristup u izradi aplikacija namijenjenih turistima, ali i svima ostalim,“ kazao je načelnik Općine Stari Grad Ibrahim Hadžibajrić. Dodao je da je projekat realizovan putem općinskog Sektora za lokalni razvoj, kao još jedan od načina da Općina Stari Grad podrži razvoj turizma i privuče što veći broj turista.

Anđan Koro, predsjednik Udruženja „Čuvari tradicije“ istakao je da mu je čast što su ostvarili saradnju sa Općinom Stari Grad koja je prva prepoznala turističke potencijale Sarajeva i koja je lider. „Naš zajednički cilj je ovim projektom obogatiti

turističku ponudu Općine Stari Grad i tako turiste što duže zadržati u Sarajevu. Mi procjenjujemo da će ih naš vodič na nenametljiv način zadržati najmanje pet do sedam dana,“ kazao je Koro.

Materijal snimali McAlister i Blagojević

Sve snimke na engleskom jeziku uradio je čuveni britanski glumac David McAlister. Audio sadržaj na bosanskom jeziku je u pripremi, a njega snima poznati bh TV urednik i voditelj, Ognjen Blagojević.

Više od tri sata audio zapisa

Sa „Guide2Sarajevo“ aplikacijom, korisnik sam bira sadržaj koji ga zanima i koji želi poslušati. Na raspolaganju ima više od tri sata audio snimaka na engleskom jeziku, a uskoro će biti i na bosanskom. Snimci su podijeljeni u cjeline i njihovo trajanje je maksimalno tri minute. U te tri minute audio snimka korisnik aplikacije ima na raspolaganju najznačajnije kulturno – historijske informacije o odabranoj znamenitosti, koje su pažljivo prikupljene i objedinjene iz zvaničnih naučnih izvora i stručne literature. „Guide2Sarajevo“ sadrži i sve servisne informacije. Na jednom mjestu korisnik ima kontakte svih javnih službi u gradu (policije, hitne pomoći, ambasade, autobuske stanice, red vožnje gradskog prevoza itd).

Općina u projektu ReLOaD



U projekat uključeno pedeset gradova

Općina Stari Grad jedna je od deset bh. općina koje su uspješno ocijenjene i odabrane za učešće u implementaciji ReLOaD projekta.

Regionalni program lokalne demokratije na Zapadnom Balkanu (ReLOaD) je inicijativa Evropske unije i Razvojnog programa Ujedinjenih nacija. Ukupan budžet projekta je 10 miliona eura, od toga 8,5 miliona finansira Evropska unija, a ostatak od 1,5 miliona eura sufinansiraće UNDP i jedinice lokalne samouprave uključene u ReLOaD.

ReLOaD inicijativa će poboljšati saradnju između lokalnih vlasti i organizacija civilnog društva (OCD), fokusirajući se na transparentno finansiranje OCD-a širom Zapadnog Balkana. Od 2017. do 2020. godine 38.000 građana će imati koristi od 200 projekata, koji će biti realizovani u skladu sa lokalnim prioritetima. Ove projekte će realizirati OCD-ovi, u saradnji sa jedinicama lokalne samouprave, a bit će uključeno 50 gradova i općina u šest zemalja Zapadnog Balkana.

U Općini Stari Grad su 13. i 14. septembra održani treninzi za predstavnike organizacija civilnog društva. Cilj treninga je bio pružanje predstavnicima OCD dodatna znanja o upravljanju projektnim ciklusom kako bi mogli sa kvalitetno osmišljenim i napisanim projektnim prijedlozima aplicirati na javni poziv ali i na pozive drugih domaćih i međunarodnih donatora.

Osim Općine Stari Grad u ReLOaD projektu će učestvovati: Banja Luka, Bijeljina, Jablanica, Maglaj, Teslić, Tešanj, Travnik, Trebinje i Tuzla. Pripreme za učešće u implementaciji ReLOaD projekta, kao i procedure javnog poziva i treninga izvršio je općinski Sektor za lokalni razvoj.

Infrastruktura

Sanacija i asfaltiranje ulica i trotoara

Nekoliko ulica u Starom Gradu u prethodna tri mjeseca, sanirano je i asfaltirano. Ustanovljeno je da ove ulice imaju kolovozna oštećenja, dok su podzemne instalacije u zadovoljavajućem stanju, tako da je urađeno samo asfaltiranje uz izradu novih ivičnjaka, šahtova i slivničkih rešetki. Radilo se u užem gradskom jezgri, gdje su rekonstruisani trotoari u jednoj od najprometnijih gradskih ulica – ulici Mula Mustafe Bašeskije, zatim na Vratniku, u Babića bašči, na Trebeviću...

Jekovac

Ulica Jekovac, od spoja sa ulicom Nevjestina - ispod Žute tabije, do raskrsnice sa ulicom Vratnik mejdan, u dužini skoro 200 metara, rekonstruisana je i asfaltirana.

Radovi su se odvijali i dvije faze: od spoja sa ulicom Nevjestina do vrtića Pčelica, te od tog dijela do spoja sa ulicom Vratnik mejdan. Projekat je koštao 48.000 KM.

Čeljigovići

U mjesnoj zajednici Babića bašča asfaltirana je i rekonstruisana ulica Čeljigovići, dužine 208 metara i prosječne širine četiri metra. Kako je pojašnjeno u Službi za investicije, plan i analizu Općine Stari Grad dio ulice Čeljigovići, od džamije do raskrsnice sa ulicom Hošin brijeg nije urađen zbog planiranih radova na rekonstrukciji kanalizacione mreže. Općina Stari Grad je bila finansijer i ovog projekta sa oko 38.000 KM.



Jekovac - radovi u dvije faze

Dio puta kod Pino Nature Hotela

Urađena je i sanacija dijela puta na Trebeviću, kod Pino Nature Hotela, jednog od omiljenih odredišta Sarajlija. Asfaltirana je dionica od Hotela prema raskrsnici za skijaški dom, dužine 104 metra i prosječne širine četiri metra. Za ove radove Općina je izdvojila oko 15.000 konvertibilnih maraka.

Trotoari u ulici Mula Mustafe Bašeskije

Trotoari u ulici Mula Mustafe Bašeskije (lijeva strana), od Muzeja Jevreja do Tržnice-ukupne dužine 323 metra, u potpunosti su rekonstruisani, uključujući novi asfalt, ivičnjake, šahtove i drenažne cijevi. Projekat je Općina fi-



Dio puta na Trebeviću

nansirala iznosom od oko 42.000 KM. U sklopu projekta asfaltiran je i parking ispred Muzeja Jevreja.

Proširenja na saobraćajnici Mošćanica


Urađena su proširenja glavne saobraćajnice u mjesnoj zajednici Mošćanica. S obzirom da je saobraćajnica na određenim lokacijama dosta uska i otežano se odvijao saobraćaj, Općina Stari Grad je angažovala KJKP "Rad" da uradi proširenja na šest lokacija. Proširenja su urađena na sljedećim mjestima: kod skretanja za Haznadareviće, preko puta mosta za Obhodžu, Mošćanica 13 – desna krivina, kod objekta u ulici Mošćanica 22 - lijeva krivina, kod Vile Atelier u ulici Mošćanica 19, iznad skretanja za romsko naselje. Radovi su koštali 23.500 KM.



Čeljigovići - sanirano 208 metara



Trotoari u ulici Mula Mustafe Bašeskije



Proširenja u ulici Mošćanica

Sanirane kaldrme na Širokači, Vratniku, Mahmutovcu...



Begovac



Kršilovac

U protekla tri mjeseca Općina je izdvojila više od 140.000 konvertibilnih maraka za sanaciju kaldrma u Starom Gradu. Kaldrme su sanirane u ulicama: Tandareva, Porčina, Kršilovac, Begovac i Mahmutovac - dva kraka. Riječ je o zahvatima koji su realizovani u okviru programa sanacije i održavanja lokalnih i makadamskih puteva na području općine Stari Grad. Općina već godinama, ulaže značajna finansijska sredstva u očuvanje autentičnog izgleda svojih ulica, a kaldrmisana stepeništa u mahalama predstavljaju ono po čemu je prepoznatljiv Stari Grad.

Tandareva

U ulici Tandareva, na Širokači sanirano je oko 50 metara kaldrmisanog stepeništa. Radovi u Tandarevoj ulici su podrazumijevali vađenje starog kamena, betoniranje podloge, te ugradnju novog kamena i završno fugiranje. Izvođač je bila firma Sela d.o.o, a vrijednost investicije iznosi oko 14.000 KM.

Porčina

U Porčinoj je urađena druga faza radova sanacije kaldrme koja je počela prošle godine. Tada je sanirano oko 50 metara, a ove godine preostalih 70 metara. Radove je izvodila firma Klico trans gradnja d.o.o, a za projekta je izdvojeno preko 48.000 KM, dok je za prošlogodišnje radove u

Porčinoj ulici izdvojeno oko 30.000 KM.

Kršilovac

Sanirana je kaldrma i u ulici Kršilovac. Pored sanacije gazišta, urađena je i oborinska/kišna kanalizacija. Općina je za ovaj projekat iz budžeta izdvojila oko 19.500 konvertibilnih maraka. Oko 70% ukupne površine stepeništa pokriveno je novim kamenom, a u preostalom dijelu iskorišten je stari. Ugrađeni su novi kameni ivičnjaci radi sprječavanja prodora oborinske vode u dvorišta.

Begovac

Na Mahmutovcu, u ulici Begovac, također je urađena sanacija kaldrme. Pored sanacije gazišta, urađeno je i fugiranje kompletne površine, te podešavanje šibera i rešetki na visinu novoizgrađene kaldrme. Dionica na kojoj se radilo duga je oko 110 metara. Izvođač radova je bila firma „Sela“ d.o.o. iz Sarajeva, a radovi su koštali oko 29.200 KM.



Porčina

Mahmutovac

U ulici Mahmutovac obnovljena su dva kraka kaldrme. U prvom kraku ulice, od broja 60 do 62 sanirana je površina od 60 metara kvadratnih. U drugom kraju, od broja 20 pa do kraja ulice Mahmutovac, zbog velikih oštećenja ugrađeno je 70 odsto novog kamena. Za sanaciju kaldrme na Mahmutovcu, Općina je izdvojila 30.000 konvertibilnih maraka, a izvođač radova je firma Klico trans gradnja.



Mahmutovac



Tandareva

Projekti

Rekonstrukcija kanalizacione i vodovodne mreže

Zamijenjene stare, dotrajale cijevi i urađeni pojedinačni priključci ● Riješeni dugogodišnji problemi izljevanja vode na ulicu i stvaranja poledice

Tokom sezone građevinskih radova u Starom Gradu se intenzivno radilo na rekonstrukciji vodovodne i kanalizacione mreže na onim lokacijama koje su bile u najkritičnijem stanju, kako bi se spremno dočekala predstojeća zima. Riječ je o ulicama gdje se voda često izljevila na ulicu zbog starih i dotrajalih cijevi, pa je nerijetko dolazilo do stvaranja poledice, pa i saobraćajnih udesa.

Najkritičnije je bilo u ulicama Logavina, Iza Hrida, Balibegovica i na Sedreniku. Rekonstrukcija podzemnih instalacija krenula je od Širokače

i ulice Balibegovica, potom su ekipe premještene na Hrid u ulicu Iza Hrida, a uporedo s tim počeli su i radovi u Logavinoj. Izvođač je bila firma "Mibral" iz Sarajeva. Sve projekte finansirala je Općina Stari Grad.

Balibegovica

Višegodišnji problem stanovnika ulice Balibegovica sa cijevima koje su pucale i plavile ulice, konačno je riješen u julu ove godine. Na dijelu ulice od spoja sa ulicom Mujkanovića, do ulice Terzibašina, u ukupnoj dužini od 105 metara, urađena je kompletna rekonstrukcija vodovodne i kanalizacione

mreže, nakon čega je ulica asfaltirana. Zamijenjeni su glavni vodovi fekalne i oborinske kanalizacije, a potom je urađena i nova vodovodna mreža. Sva domaćinstva u ulici dobila su nove pojedinačne priključke. Općina je ovu investiciju finansirala iznosom od 170.000 KM.

Sedrenik

Na Sedreniku je izvršeno polaganje nove glavne vodovodne cijevi dužinom cijele trase i urađeni pojedinačni priključci za stambene objekte u ulici. Potom se pristupilo asfaltiranju ulice. Radilo se od mezarja Bakije do raskršća za Barice, u dužini od 520 metara. Radovi na vodovodnoj mreži, u vrijednosti od oko 166.000 KM, finansirani su iz

Na Sedreniku zbog dotrajalih cijevi bila neophodna rekonstrukcija

U ulici Sedrenik prvobitno je planirana sanacija asfalta, ali nakon skidanja starog sloja i pokušaja tamponiranja identifikovani su brojni kvarovi na vodovodnim cijevima. Iz tog razloga, pristupilo se zamjeni glavnog voda i pojedinačnih priključaka. Radove na Sedreniku izveo je KJKP "Rad".

sredstava vodnih naknada koja pripadaju Općini Stari Grad, a preusmjerena su iz Ministarstva komunalne privrede i infrastrukture KS. Sanaciju i asfaltiranje ulice Općina je finansirala iznosom od 138.000 KM, tako da je ukupno u radove u ulici Sedrenik investirano preko 300.000 KM.

Logavina

Radovi na rekonstrukciji vodovodne mreže u ulici Logavina, na dijelu od ulice Čemerlina do ulice Adžemovića, izvedeni su pred samu jesen. Firma "Mibral" d.o.o., prvo je postavila privremeni vod kojim su se domaćinstva u ovoj ulici snabdijevala vodom tokom rekonstruk-



Balibegovica



Sedrenik



Iza Hrida



Desete brdske brigade



Logavina

cije vodovodne mreže. Postavljeno je preko 220 metara novih vodovodnih cijevi. Nakon polaganja glavnog cjevovoda urađeno je i oko 30 novih priključaka. U toku je asfaltiranje ulice. Projekat je koštao oko 109.000 konvertibilnih maraka.

Iza Hrida

U ulici Iza Hrida urađena je rekonstrukcija vodovodne mreže i postavljen novi vod u dužini od 275 metara, a potom je počelo asfaltiranje, s tim da je dionica produžena za još 30 metara.

Radilo se od spoja sa ulicom Kamenica, do OŠ "Šejh Muhamed ef Hadžijamaković". Općina je ovu investiciju finansirala iznosom od 174.000 KM, međutim radovi na ovome neće stati. Prema najavama iz nadležne službe, asfaltiranje će se raditi i u suprotnom pravcu, odnosno i ulica Huremuša bit će presvučena novim asfaltom sve do spoja sa ulicom Put Mladih muslimana (tranzit). Time će cijela ova dionica na Hridu dobiti novi asfalt.

Ulica 10. brdske brigade

U ulici 10. brdske brigade, od broja 9 do boja 16, urađena je sanacija kanalizacione mreže i asfaltiranje, početkom juna ove godine. Još na jesen prošle godine pokrenuti su radovi sanacije kanalizacione mreže, jer je lokalno stanovništvo niz godina imalo problem vlage u svojim kućama zbog starih i oštećenih kanalizacionih instalacija i podzemnih voda. No u prvim fazama radova su nenadano otkrivene određene podzemne plinske i strujne instalacije, što je radove prolongiralo do ove godine. Prvo je uklonjen asfalt na vrlo strmom terenu, te su postavljene nove PVC kanalizacione cijevi, posebno cijevi za kanalizaciju, te cijevi za kućne priključke. Radove je izvodila firma "Set invest" d.o.o, a troškove je snosila Općina iznosom od 17.000 KM. Izdvojeno je još 6.000 KM za asfaltiranje ovog dijela ulice.

Radi se i u ulici Muse Ćazima Ćatića

Nakon što je skinut stari asfalt, te urađen privremeni vod, počela je rekonstrukcija vodovodne mreže u ulici Muse Ćazima Ćatića. Mreža će biti rekonstruisana cijelom dužinom ulice od oko 300 metara, a radove izvodi KJKP 'Vodovod i kanalizacija'.

Po završetku ovih radova, ulica će se asfaltirati. U rekonstrukciju mreže uloženo je 130.000 KM i ta sredstva je preusmjerio Kanton Sarajevo, a ona pripadaju Općini Stari Grad na ime vodnih naknada. Radove asfaltiranja finansira Općina sa oko 90.000 KM.



Muse Ćazima Ćatića

Civilna zaštita

Preventivne aktivnosti civilne zaštite

Služba civilne zaštite Općine Stari Grad Sarajevo kontinuirano provodi aktivnosti koje su vezane za zaštitu ljudi i njihove imovine u slučaju elementarnih nepogoda.

Uređenje Čolinog i Bistričkog potoka

U cilju zaštite ljudi i imovine u slučaju obilnijih padavina i poplava, urađeno je još jedno u nizu čišćenja Bistričkog i Čolinog potoka. Ove aktivnosti Služba civilne zaštite provodi kontinuirano, s obzirom da na ove dvije lokacije često dolazi do nakupljanja otpada, nanosa i ostalog. Izvučene su veće količine otpada, a korita vraćena u zadovoljavajuće stanje, nakon čega su postavljene i zaštitne rešetke. Ove radove izvela je služba zaštite i spašavanja od rušenja – Klico trans.

Zaštitna ograda na Bistriku

Postavljena je zaštitna ograda na tunel koji se nalazi na magistralnom putu na Bistriku. Na ovaj način će se spriječiti eventualno padanje šiblja ili drugih elemenata, koji bi mogli ugroziti saobraćaj na ovoj važnoj dionici.

U sklopu radova popravljena su i



Zaštitna ograda na tunelu

oštećenja potpornog zida u ulici Braće Eskenazi. Urađeno je fugovanje i malterisanje, koje će spriječiti obrušavanje zida na ulicu, što bi ugrozilo kretanje pješaka i saobraćaj.

Uklanjanje ruševnih objekata

U okviru akcije uklanjanja ruševnih objekata u vlasništvu Općine Stari Grad, uklonjene su ruševine u ulicama Okrugla broj 18 na Mahmutovcu, Mustafa Dovadžije na brojevima 23 i 26 na Vratniku, Hrvatini broj 6 na Bistriku, a u toku je uklanjanje na Kovačima na



Očišćen Bistrički potok

brojevima 61 i 63. Osim pomenutih lokacija, planirano je i uklanjanje objekta u ulici Braće Morić broj 11.

Riječ je o projektu tj. preventivnim mjerama koje provodi Služba civilne zaštite Općine Stari Grad u cilju zaštite i spašavanja ljudi i materijalnih dobara. Kako su nam kazali iz Službe za civilnu zaštitu svi radovi se izvode izuzetno oprezno jer se radi o objektima koji su bili u dosta lošem stanju i prijetila je opasnost po ljude i njihovu imovinu.

Za ove radove Općina Stari Grad je, putem Službe civilne zaštite, izdvojila 60.000 KM.

Očišćeno korito i zid Miljacke u Starom Gradu

Korito rijeke Miljacke, na dijelu od Drvenije do brane Bentbaša, u potpunosti je očišćeno i uređeno.

Radovi su počeli u julu ove godine, kada je Općinski štab civilne zaštite, usljed izraslog rastiinja i šiblja u koritu rijeke, te pojave zmija i glodara, donio odluku o poduzimanju hitnih mjera. Zidovi korita rijeke očišćeni su od rastiinja i trave, premazani sredstvom koje sprečava rast korova, oprani od nataloženog mulja i otpada, te fugirani. Radovi su se odvijali u više faza. Obje strane riječnog korita očišćene su u dužini od po 1.100 metara, dok je ukupna kvadratura očišćene kamene obale 9.500 m².

Za ove poslove angažovana je firma Klico trans gradnja. Važno je istaći da izvođač garantuje rok izvođenja u trajanju od deset godina, tačnije da u tom periodu neće doći do ponovnog zarastanja zidova korovom i travom.



Uređeno korito od Drvenije do brane Bentbaša

Projekti



Asfaltirano školsko dvorište na Bistriku

Općina Stari Grad finansirala je radove asfaltiranja školskog dvorišta ispred osnovne škole „Edhem Mulabdić“ na Bistriku (područni objekat). Ranije je na ovom dijelu izgrađena i nova sportska površina, dimenzija 20x10 metara, te je osnovecima koji pohađaju ovu školu uveliko olakšano pohađanje nastave i nastavni program.

Površina školskog dvorišta bila je dosta ispucala i oštećena pa su se iz škole obratili Općini za pomoć. Ovogodišnjim budžetom planirana su sredstva u iznosu od 29.000 KM za asfaltiranje školskog dvorišta, te je projekat realizovan tokom augusta. Sanirane su i podzemne instalacije, te postavljene

kanalizacione cijevi u dužini od 37 metara.

U narednom periodu bit će uređene i preostale zelene površine i ivičnjaci oko sportske površine, za što su već ostvareni kontakti sa KJKP „Rad“ koji će izvršiti sadnju cvijeća, prije kraja sezone.

Sredinom ove godine u istom dvorištu izgrađena je sportska ploha. Općina Stari Grad je izdvojila preko 15.000 KM za pripremu terena, tamponiranje, pripremu ivičnjaka, postavljanje ograde i nabavku golova. Sportsku plohu i markiranje terena doniralo je preduzeće "Mavas" d.o.o. iz Mrkonjić Grada, u vrijednosti od još 15.000 KM.

Općina sufinansira utopljanje OŠ „Hamdija Kreševljaković“

U toku je 'utopljanje' Osnovne škole „Hamdija Kreševljaković“, u starogradskom naselju Vratnik, koju pohađa oko 350 učenika. Prema riječima direktora škole, Salke Huskića, svi radovi trebali bi biti završeni do kraja oktobra, tako da će spremno dočekati narednu zimu.

Utopljanje OŠ „Hamdija Kreševljaković“ košta 227.795 KM, od čega je Ministarstvo prostornog uređenja i zaštite okoliša KS obezbijedilo 82.565 KM,

Općina Stari Grad 69.420 KM, a UNDP 75.810 KM. Izvođač radova je firma „Sela“.

„Projekat predviđa rekonstrukciju krova, utopljanje fasade, te rekonstrukciju kotlova i sistema grijanja u školskom objektu. Očekujemo da će kompletan projekat biti završen do kraja oktobra“, istakao je Huskić.

Naglasio je kako je u prethodnom periodu zamijenjena kompletna stolarija na školi, te da će realizacijom projekta biti obezbijedeni kvalitetniji uslovi za boravak i rad učenika i nastavnog osoblja.

Utopljanje OŠ „Hamdija Kreševljaković“ jedna je od aktivnosti u sklopu projekta „Zeleni ekonomski razvoj“ kojeg provodi UNDP u BiH, a finansiraju Vlada Švedske, Fond za zaštitu okoliša FBiH i Fond za zaštitu životne sredine i energetske efikasnost RS, u saradnji sa Ministarstvom vanjske trgovine i ekonomskih odnosa BiH, entitetskim ministarstvima prostornog uređenja, kantonalnim ministarstvima, te drugim partnerima.



Nova fasada i krov

Sanacija platoa Dženetića čikma



Projekat košta 11.000 KM

U starogradskoj mjesnoj zajednici Ferhadija, ulica Dženetića čikma do broja 10, radi se uređenje i betoniranje platoa ispred stambene zgrade, a uradit će se i sanacija dva potporna zida. „Uz uređenje platoa planirani su i radovi odvodnje oborinskih voda, za šta će biti postavljen odgovarajući vod,“ rekli su u nadležnoj Službi za investicije, plan i analizu Općine Stari Grad. Dodali su i da će nakon ovih radova uslijediti sanacija dva manja potporna zida na lokalitetu.

Izvođač radova je firma Set invest d.o.o., a finansiraju ih Općina Stari Grad sa oko 11.000 KM.

Postavljena zaštitna mreža u ulici Pogledine



Zaštitna ograda dužine 76 metara

U ulici Pogledine, na području MZ Hrid-Jarčedoli, postavljena je zaštitna ograda u dužini od 76 metara, s ciljem sprječavanja odlaganja otpada koji neodgovorni pojedinci konstantno ostavljaju. Općina je odlučila da ogradi prostor i tako spriječi odlaganje kabastog i drugog otpada na ovo mjesto, kako se ne bi stvorila „divlja“ deponija.

Izvođač radova na postavljanju zaštitne mreže bila je firma „Fadž company“, a projekat je sa oko 6.700 KM finansirala Općina.

Na Baščaršiji i Ferhadiji postavljene korpe za otpad



Na 15 lokacija postavljene korpe

U užem starogradskom jezgru, na Baščaršiji i ulici Ferhadija, ovog ljeta postavljene su kante za otpad na 15 lokacija čime je riješen problem odlaganja manjeg otpada u naprometnijem dijelu Starog Grada. Iz Službe za komunalne poslove pojasnili su da je na devet lokacija izvršena zamjena postojećih korpi. „Na devet lokacija korpe su bile stare i oštećene, te su narušavale izgled općine. Zamijenili smo ih novim, tzv duplim korpama“. Pored tih, korpe su stavljene na još šest lokacija za koje se ukazala potreba za sistemskim odlaganjem otpada.

Nove korpe postavljene su na sljedećim lokacijama: Čurčiluk veliki (pored Grateksa), Obala Kulina-bana (pored restorana Konyali), Baščaršija (pored taxi i kombi stajališta), Sarači broj 33 (Kuršumlija medresa), Sarači (pored česme uz Begovu džamiju), Ferhadija (pored prodavnice Astra), Ferhadija (ispred objekta Fibula), Trg fra Grge Martića (pored Apoteke Sarajevo), Baščaršijski trg (ispred Čaršijske džamije, pored apoteke 'Betty', uz objekat na broju 15), Sarači (ispred objekta BH Telecoma), Sarači – Đulagina (na uglu objekta Medrese) i Ferhadija (na uglu Gazi Husrev-begovog bezistana). Pored toga, još dvije 'duple' korpe postavljene su na Baščaršijskom trgu, preko puta tramvajske stanice.

Projekt postavljanja kanti za otpad s oko 7.000 KM finansirala je Općina Stari Grad.



Duple korpe za otpad

Projekti

Općina oformila odjeljenje za održavanje javnih površina



Novoformirano odjeljenje za održavanje

Načelnik Općine Stari Grad Ibrahim Hadžibajrić oformio je odjeljenje za održavanje Aleje ambasadora, cestovnih pojasa i javnih površina, pri Službi za inspekcijske i komunalne poslove. U odjeljenje je zaposleno pet pomoćnih radnika koji su već raspoređeni na teren gdje kose travu, uklanjaju šibljice i nisko rastinje.

Usljed sve većih potreba za održavanjem Aleje ambasadora, kao i brojnih javnih površina koje su često obrasle travom i rastinjem u ljetnom periodu, te pojave zmijsa i glodara, pokretanje ovog odjeljenja, koje je zamišljeno kao jedna vrsta putarske službe, bilo je neminovno.

„Raspisali smo javni oglas za prijem pomoćnih radnika prije nekoliko mjeseci. Nismo imali nikakve posebne uslove, osim da se jave ljudi koji su spremni da rade fizičke poslove, da čiste, kose i rade sve što treba da općinu dovedemo u red,“ kazao je Hadžibajrić. „Ne možemo čekati na ko-

munalne firme jer se u praksi pokazalo da kasno reaguju. Svakog ljeta imamo problem sa izraslim rastinjem i travom na saobraćajnicama,“ dodao je.

Održavanje četiri glavna putna pravca

Određena su i četiri glavna putna pravca koji se moraju stalno održavati, a to su: ulica Sarajevskih gazija, Nalina (do Popovog gaja), Aleja ambasadora i ulica Zmajevac (od Višegradske kapije prema Vidikovcu), održavanje puta prema Baricama, te tzv. starog austrijskog puta na Širokači.

Kako se ovog ljeta ukazala potreba za čišćenjem i dodatnih lokacija, uposlenici Odjeljenja za održavanje javnih površina uredili su prostor oko brane na Bentbaši, Aleju ambasadora, mezarje Faletići II, ulice Logavina, Medrese, Na Varoši, Sarajevskih gazija, Za Beglukom, Bostarići, te prostor oko Mjesnih zajednica Širokača i Logavina.

Nove oznake s brojevima postavljene u još 25 ulica

Na području općine Stari Grad u junu ove godine završena je treća faza označavanja ulica i numeracije objekata, a u toku je četvrta faza. Ove radove sa 13.800 konvertibilnih maraka finansira Općina Stari Grad, a izvodi ih firma Pismolik iz Sarajeva.

Treća faza numeracije

U trećoj fazi numeracije još 18 ulica iz Starog Grada dobilo je svoje oznake. Nove table s nazivima i brojevima postavljene su u ulicama: Hendina, Budžak, Alajbegovića, Isevića sokak, Talirovića, Dugi sokak, Terzibašina, Čavljak (I dio), Hafiza Ibrahima Trebinjca, Maguda, Šeher-čehajina čikma, Toplik, Namika Burazerovića, Alije

Bejtića, Maguda čikma, Megara, Podcarina i Čadordžina.

Četvrta faza numeracije

U toku je četvrta faza projekta označavanja ulica i numeracije objekata. U sklopu ove faze već je urađena numeracija u ulicama ispod Budakovića, Ulomljenica, Hamida Svrze, Arapova i Hasana Kaimije. Preostalo je još postavljanje brojeva u ulicama Nadmlini i Halilbašića.

„U tim ulicama planirana je numeracija 63 objekta. Na šest objekata nalazit će se velike table sa nazivima ulica, dok će male table sa brojevima biti na svih 63 objekta,“ pojasnili su u Službi za komunalne poslove Općine.

Za tri mjeseca izgrađeno pet potpornih zidova

U protekla tri mjeseca na području Općine Stari Grad Sarajevo izgrađeno je pet potpornih zidova i to u ulicama: Sulejmana Zolja, dva u ulici Boguševac, Toplik i Kamenica. Svi projekti koštali su oko 90.000 KM, a finansirala ih je Općina Stari Grad.

Sulejmana Zolja

Armirano-betonski potporni zid u ulici Sulejmana Zolja do broja 7, na Mahmutovcu izgrađen je u dužini od 28 metara. Gradnja ovog zida koštala je oko 13.000 KM, a izvođač radova bila je firma Klico trans d.o.o. Zid je izgrađen u cilju osiguranja saobraćajnice koja prolazi kroz naselje, a kako bi se zaustavilo obrušavanje terena.

Boguševac do broja 25 i 50

Nakon sanacije urušenog potpornog zida u ulici Boguševac do broja 25, izvedeni su i radovi izgradnje novog potpornog zida u istoj ulici do broja 50. Zid na broju 25 je srušen, te je uslijedila gradnja novog, dužine deset metara. Po završetku ovih radova, radnici firme Klico trans gradnja d.o.o. su počeli su gradnju potpornog zida u istoj ulici do broja 50, u dužini od 22 metra. Za projekat sanacije i izgradnje dva zida na Toki-Džeki izdvojeno je oko 20.000 KM.

Toplik

Na Alifakovcu je izgrađen novi potporni zid, u ulici Toplik broj 25. Zid, koji je sagrađen u cilju sprječavanja obrušavanja terena, dug je 10 metara. Postavljena je i zaštitna rukohvatna ograda nakon sanacije zida. Radove je izvodila firma Bosman d.o.o. Sarajevo, a koštali su oko 8.000 KM.

Kamenica potok

Na strmom terenu, u ulici Kamenica potok do br 16, na Mahmutovcu, zaustavljeno je pokretanje tla izgradnjom potpornog zida. Projekat izgradnje zida dužine 51 metar realizovala je firma Winner project d.o.o. Sarajevo, a koštao je 48.000 KM.



Sulejmana Zolja



Boguševac do broja 50



Toplik



Kamenica potok

Novčane hedije boračkoj populaciji



Hedije za 350 osoba

Novčane hedije, povodom ramazanskog i Kurban bajrama, od Općine Stari Grad dobilo je 350 pripadnika boračke populacije. Ovu pomoć bivšim borcima i članovima njihovih porodica uručili su predstavnici Općine Stari Grad tokom tradicionalnih druženja povodom Bajrama, održanih 23. juna i 31. avgusta. 2017. godine. Novčane hedije po 100 KM dobilo je 200 porodica šehida i poginulih boraca, 100 nezaposlenih ratnih vojnih invalida i 50 nezaposlenih demobilisanih boraca.

Druženju s pripadnicima boračke populacije su prisustvovali načelnik Općine Ibrahim Hadžibajrić, predsjedavajući Općinskog vijeća Jusuf Pušina, njegovi zamjenici Sanel Dragolovčanin i Irfan Čengić, te pomoćnik načelnika za boračko-invalidsku i socijalnu zaštitu Senad Musić.

Općina izdvojila 45.000 KM za nišane i spomen-obilježja



Izdvojeno 45.000 KM za Fond memorijala

Općina Stari Grad i Fond memorijala KS potpisali su Sporazum o sufinansiranju projekta izrade i postavljanja nišana i spomen obilježja šehidima, poginulim borcima i umrlim braniteljima Armije RBiH, koji su ukopani na grobljima na području Kantona Sarajevo. Sporazum su potpisali načelnik Općine Stari Grad Ibrahim Hadžibajrić i direktor Fonda memorijala Kantona Sarajevo Suad Zijadić, a prema kojem je Općina preuzela obavezu da za ove namjene izdvoji 45.000 KM.

Podrška 23. SFF-u od 15.000 KM



Purivatra i Hadžibajrić

Potpisivanjem Ugovora o dodjeli novčanih sredstava, Općina Stari Grad nastavila je dugogodišnju tradiciju davanja podrške najvećem i najboljem filmskom festivalu u ovom dijelu Evrope, 23. Sarajevo Film Festivalu.

Ugovor su svečano potpisali načelnik Općine Stari Grad Ibrahim Hadžibajrić i direktor Sarajevo Film Festivala Mirsad Purivatra, a potpisivanju je prisustvovao i predsjedavajući Općinskog vijeća Stari Grad Jusuf Pušina.

Općina Stari Grad je za aktivnosti 23. SFF-a izdvojila 15.000 KM, dok je od 2009. godine, zaključno sa ovom godinom, ukupno izdvojila oko 120.000 KM. Načelnik Hadžibajrić je izjavio da Općina, pored svih dosadašnjih ugovora, SFF-u stoji na raspolaganju i u svakom drugom smislu. Sarajevo Film Festival trajao je od 11. avgusta do 19. avgusta.

Nextbike i u Starom Gradu



Postavljeni terminali za bicikla

Općina Stari Grad dobila je u julu Nextbike stanicu i to na Trgu oslobođenja – Alija Izetbegović. Ovo je deveta Nextbike stanica u Sarajevu, čije postavljanje su omogućili Općina Stari Grad i Addiko bank dd. Ukupna vrijednost Nextbike stanice u Općini Stari Grad iznosi 32.837,41 KM, a njena implementacija je pomognuta subvencijom Općine Stari Grad u iznosu od 7.000 KM, dok su ostatak novca obezbijedili Addiko Bank dd i Nextbike BiH.

Na Trgu oslobođenja – Alija Izetbegović postavljeno je deset bicikala s terminalom i parkiralištima za bicikla, koje građani mogu koristiti po već ustaljenim procedurama Nextbike BiH. Općina Stari Grad je prva sarajevska općina koja je i finansijski podržala ovaj projekat, realizovan putem Sektora za lokalni razvoj.

Obrazovanje



Starogradski prvacići uz ples, pjesmice i slatkiše proslavili početak škole

Prvacići koji su ove godine sjeli u školske klupe u Starom Gradu, od Općine Stari Grad dobili su ruksake, školski pribor i paketiće sa slatkišima za što ugodniji i lakši početak školovanja.

Svečanost povodom prijema prvacića, uz nastup njihovih drugara iz starijih razreda, Općina Stari Grad organizovala je na platou ispred zgrade Općine.

Ukupno 245 prvacića iz škola „Saburina“, „Hamdija Kreševljaković“, „Vrhbosna“, „Šejh ef. Hadžijamaković“, „Edhem Mulabdić“, „Mula Mustafa Bašeskija“ i Zavoda „Mjedenica“ zabavljali su se uz ples, igru i pjesmice.

Školarce je pozdravio predsjedavajući Općinskog vijeća Stari Grad Jusuf Pušina,

koji im je poručio da uvijek ostanu veseli, sretni i bezbrižni.

„Ovo je dan koji ćete vi, djeco, pamtiti čitavog života. Pred nama su danas budući predsjednici država, ambasadori, načelnici općina, predsjedavajući, ministri, ljekari, akademici... To vi danas još ne znate, ali kvalitetno obrazovanje koje ćete steći omogućit će vam da to postanete,“ kazao je Pušina. Poručio im je da dobro uče, ali i da uvijek ostanu raspoloženi kao danas. U ime Općine Stari Grad i načelnika mr. Ibrahima Hadžibajrića poželio im je da budu dobri učenici, usvoje puno lijepih i vrijednih navika, i da sa radošću uče prva slova i brojeve, prve pjesmice i plesne korake.

Stipendiranje učenika koji izučavaju deficitarne zanate

Općina Stari Grad je, u cilju motiviranja mladih ljudi da se više odlučuju na zanatsko školovanje, koje mnogo brže dovodi do zaposlenja i rješavanja egzistencijalnih potreba, odlučila ove godine dodjeljivati im stipendije.

Nažalost, odziv nije bio najbolji, pa se na javni poziv za stipendiranje učenika deficitarnih zanata prijavilo 16 aplikantata, dok za stare, tradicionalne zanate uopšte nije bilo zainteresovanih za stipendije. Od 16 prijavljenih, veliki broj nije ispunjavao uslove javnog poziva, pa je stipendije dobilo pet učenika.

„Ovih pet učenika je zadovoljilo uslove Javnog poziva koji je objavljen krajem aprila ove godine, te je ovo stipendija



Načelnik sa stipendistima

za proteklu školsku 2016/2017. godinu,“ pojasnili su u nadležnoj Službi za obrazovanje, kulturu i sport.

Bogata sportska sezona za osnovce u Starom Gradu

Iz Službe za obrazovanje, kulturu i sport najavljena je bogata i raznovrsna sportska sezona 2017/2018. za starogradske osnovce. Projekat uvođenja ligaškog takmičenja u fudbalu i odbojci 2014. i 2015. godine pokazao se kao pun pogodak, te su pomenute lige iz godine u godinu rasle, a prošle godine uvedena je i šahovska liga za učenike osnovnih škola iz Starog Grada. Od nastupajuće sezone 2017/2018. Općina Stari Grad uvodi i ligaška takmičenja svojih osnovaca u košarci i stonome tenisu, a već su izvršene i određene pripreme.

u Centru za mali fudbal Bentbaša, a tačan dan kada će se igrati utakmice i satnice će se naknadno saznati, zbog dodatnog usaglašavanja šest škola i općinske službe. Inače, titulu od prošle godine brani OŠ „Hamdija Kreševljaković“.

Odbojkaška liga Starog Grada

Odbojkaška liga na rasporedu je od početka novembra, odbojkašice OŠ „Šejh Muhamed ef. Hadžijamaković“ su dosad jedine pobjednice tog takmičenja, jer su titulu uzele u obje dosad organizovane odbojkaške

dija Kreševljaković“, pa će i oni pokušati odbraniti tu titulu. Jesenji dio ovog takmičenja počinje krajem novembra. Ligu, uz Općinu Stari Grad, organizuje i Šahovski klub „Stari Grad“, a svoje prostorije za odigravanje redovnih kola je ponudila OŠ „Hamdija Kreševljaković“.

Stonoteniska liga Starog Grada

Pripreme za premijernu sezonu ovog takmičenja su počele još u proljeće, kada je Općina Stari Grad kupila 15 stolova za stoni tenis svim starogradskim osnovnim školama, kao i Zavodu Mjedenica. Trenutno se osnivaju stonoteniske sekcije unutar škola, te će tako svaka škola odrediti svoju reprezentaciju, sačinjenu od dva najbolja stonoteniseri i jedne najbolje stonoteniserke. Mečevi će se igrati u OŠ „Saburina“, a termini i tačan datum će biti naknadno poznati.

Košarkaška liga Starog Grada

Za pripremu košarkaške lige, Općina Stari Grad je finansirala kupovinu specijaliziranih koševa koji imaju mogućnost mijenjanja visine, a instalirani su u novoj sali OŠ „Mula Mustafa Bašeskija“. Značajnu ulogu u organizaciji ovog takmičenja preuzet će Škola košarke BBY (Bosnian youth basket), a plan je da mečevi startaju početkom decembra.

Općina Stari Grad je za održavanje fudbalske, košarkaške, odbojkaške, šahovske i stonoteniske lige planirala oko 40.000 KM koje će biti utrošene za opremu, nagrade najboljima, naknade za trenere i sudije i sl. Osim toga, za već navedeno opremanje sala uloženo je dodatnih 19.000 KM.



Pet sportskih liga za osnovce

Fudbalska liga Starog Grada

Najstarije, ali i najpopularnije ligaško takmičenje osnovaca u Starom Gradu, fudbalska liga osnovaca, ulazi u svoju četvrtu sezonu. Ova sezona će imati 10 kola, a jesenji dio počinje krajem ovog mjeseca. Utakmice će se igrati kao i prošle godine

lige. Liga će se organizovati u saradnji sa Odbojkaškom akademijom „Smeč“, dok će se mečevi igrati u novoizgrađenoj sali OŠ „Mula Mustafa Bašeskija“.

Šahovska liga Starog Grada

Najbolji mladi šahisti iz Starog Grada za prošlu sezonu su učenici iz OŠ „Ham-

U posjeti prijateljskom gradu Buzet

Od 08. do 10. septembra održana je manifestacija Dani Grada Buzeta iz Republike Hrvatske, a gosti su bili i predstavnici Općine Stari Grad. Inače prijateljski odnosi ove dvije lokalne samouprave datiraju iz 2012. godine, kada je tadašnji gradonačelnik, a sadašnji župan Istarske županije, Valter Flego prvi put posjetio Općinu Stari Grad. Pored izuzetno bogatog kulturno-umjetničkog programa, posebno mjesto u obilježavanju Dana Grada Buzeta je zauzimala i svečana sjednica Gradskog vijeća. Gradonačelnik Buzeta Siniža Žulić se zahvalio delegaciji Općine Stari Grad na posjeti, a činili su je općinski službenici Senad Musić i Sanin Hadžibajrić, te općinski vijećnici Sanel Dragolovčanin i Said Katica.



Delegacija Općine Stari Grad u prijateljskoj posjeti Buzetu

Predstavljamo uspješne male privrednike iz Starog Grada

Jahanje konja nova atrakcija u Starom Gradu

Konjički klub "Hidalgo", nalazi se na Sedreniku i nudi savršenu rekreaciju nakon napornog radnog dana

Na Sedreniku, u neposrednoj blizini OŠ Sedrenik (područni objekat OŠ "Mula Mustafa Bašeskija), udaljen svega pet minuta vožnje automobilom od Bašćaršije, nalazi se Konjički klub „Hidalgo“. Jedinstveno iskustvo jahanja konja u ovom klubu mogu doživjeti, kako osobe sa iskustvom u jahanju, tako i početnici, pa i djeca. Za prvu pomoć tu su obučeni i stručni instruktori.

Zahvaljujući višegodišnjem iskustvu u radu sa konjima Suada Vražalice, Konjički klub „Hidalgo“, koji je u dugogodišnjem vlasništvu porodice Potogija, sada je u novom ruhu i uspješno posluje. Sa Vražalicom, koji je 40. godina živio i radio u Francuskoj, klub je vidno uznapredovao, a kako kaže i sam Muhamed Potogija ovo je samo početak.

Bez zadovoljnih konja, nema ni zadovoljnih jahača

PR menadžer kluba „Hidalgo“, Vedran Hasanagić, kaže da je „Hidalgo“ otvoren za sve ljubitelje ovog sporta. „Napravljen je novi jahači manjež dimenzija 60x40 metara i trenutno je najveći u Bosni i Hercegovini. Klub je obogaćen i novim okruglim padokom za obuku jahača početnika i trening konja. Za komfor konja, renovirali smo i obnovili štalu i boksove jer bez zadovoljnih konja, nema ni zadovoljnih jahača“, pojasnio je Hasanagić.

Klub posjeduje 14 vrhunskih grla, od čega je 10 utrenirano i koriste se za svakodnevne obuke.

Istakao je kako su konji pripremljeni



KK "Hidalgo" otvoren za sve ljubitelje sporta

Besplatne konsultacije sa trenerima

Jahanje konja u Starom Gradu i Sarajevu postaje sve popularniji vid rekreacije za lokalno stanovništvo i turiste. Konjički klub „Hidalgo“ na Sedreniku, najbliži je centru grada. Jahačka ponuda „Hidalga“ nudi besplatne konsultacije i upoznavanje sa trenerima i konjima prije nego odlučite da li su časovi jahanja za vas ili vašu djecu.

za jahače svih uzrasta, te da časove vode certifikovani instruktori. Kazao je kako su se za ovaj posao odlučili jer su sportovi sa životinjama malobrojni, a ovakvi klubovi rijetki. "Želimo da se djeca što više približe konjima i životinjama uopšte, kao i prirodi", ispričao je Hasanagić.

Istinskih zaljubljenik u konjički sport

Suad Vražalica, koji je istinskih zaljubljenik u konjički sport, kazao je da je ponuda raznovrsna. „Osim treniranja u manježu, imamo i vanjska jahanja. Za osobe koje već imaju jahačko iskustvo i za napredne učenike škole jahanja organizujemo i grupne jahačke ture u prirodu, a najčešće idemo na Čavljak“, ističe Vražalica. Podsjetio je da konjički sport nema starosne granice i da je to jedini sport u kojem se ravnopravno takmiče muškarci i žene.

Ako smo Vam makar na trenutak probudili maštu i želju za avanturom, posjetite web stranicu kkhidalgo.com ili pozovite broj telefona 066 166 450 i saznajte sve o jahačkoj ponudi „Hidalga“.



Vražalica i Potogija zaljubljenici u konjički sport



Hasanagić sa utreniranim grlima za jahanje



Novi jahački manjež

Stavo Sarajjevo

Piše: **MUFID GARIBIJA**, sarajevski arhitekta

Sinanova tekija

Priča o nastanku Hadži Sinanove tekije počinje čak u dalekom Bagdadu. Davne 1638. godine mladi osmanski Sultan Murat IV u svojoj 26. godini osvojio je ovaj prelijepi grad. Kako je sam bio poštovalac sufizma znao je da se upravo ovdje nalazi mezar jednog od velikana Islama, Seida Abdul Kadir Gejlanija, začetnika Kaderijskog

međuvremenu je Božijim određenjem usnio da tekiju ipak treba podići sa druge strane rijeke. Poslušao je ovaj išaret iz sna, otišao na drugu stranu i pronašao zemlju na Pirinom brijegu, u mahali poznatoj kao Vrbanjuša.

Za neimara je izabran Kasim Aga, Albanac porijeklom koji je svoje umijeće dokazao radom na Top

ispijanje kahve, kuhinju i dodatne prostorije. Na spratu iznad ulaza nalazile su se i prostorije za šejha. Ona je imala i ženske odaje u zasebnoj kući odmah pored semahane, kako bi i žene mogle učestvovati u zikru tj. obredu hvaljenja i veličanja Allaha. Na samom ulazu posjetitelje ovog lijepog zdanja bi dočekala kaldrmisana avlija omeđena drvenim vanjskim sofama preko kojih se ulazilo u prostorije nanizane na desnoj strani. Ima mnoštvo levhi ispisanih po zidovima, posebno na avliji, a u unutrašnjosti se ističe velika freska pečata Sulejmana a.s. prečnika tri metra. U njoj je dvanaest puta ispisan šehadet, što simbolično predstavlja dvanaest sufijskih redova koji svi šalju istu poruku božijeg jedinstva.



tarikata. Seid Gejlani nije bio samo veliki sufija, nego i potomak loze Poslanika a.s. Iz zahvalnosti Allahu dž.š. za osvajanje Bagdada, Sultan je odlučio finansirati podizanje jedne kaderijske tekije.

Među sultanovom svitom tada je bio i Mustafa paša Silahtar (oružar), Sarajlija koji je brzo napredovao u sultanovoj vojsci i došao na visok položaj. On je predložio da kaderijsku tekiju podigne u njegovom rodnom gradu gdje takve tekije još nije bilo. Mustafa paša je pojasnio Sultanu da ima oca u Sarajevu koji je voljan i pouzdan da na sebe preuzme ovaj zadatak. Tako je u naš grad stigao ferman da će se graditi kaderijska tekija i da će poslove voditi Hadži Sinan, otac Mustafa.

Kapi palati u Carigradu. Zemlju je od svojih sredstava uvakufio Hadži Sinan, a izgradnju tekije je finansirao Sultan Murat IV koji je preselio na Bolji svijet 1640. Tekija tada još nije bila završena, pa je finalne radove iz vlastitih sredstava platio Mustafa paša Silahtar, pa se njena vrata otvoriše još iste godine.

Sinanova tekija je građena od tesanog kamena i u svom sastavu ima semahanu dimenzija 9,55 x 9,65 metara, visoku šest metara koju drvena musandara (galerija) opasava sa tri strane. Tekija ima i mejdan (odaju za razgovor), kahve odžak za

Pod zaštitom
nacionalne Komisije

Kroz historiju je gorjela dva puta, dolaskom Eugena Savojskog i dolaskom Austro-Ugara. U tekijskim spisima brižljivo su zapisana i čuvana imena svih 17 šejhova od postanka tekije do danas. Posebno mjestu zauzimaju Šejh Kajin baba i Fejzulah ef. Hadžibajrić. Upravo je ef. Fejzulah osamdesetih godina prošlog vijeka vodio inicijativu za ponovno otvaranje svih tekija u Bosni.

Danas je pod zaštitom nacionalne komisije, a spada u red najljepših osmanskih građevina u našoj zemlji. U njen obilazak dolaze turisti i cijelog svijeta, ali i eminentne domaće i strane javne ličnosti.

Tekija na Pirinom brijegu

Hadži Sinan je u gradu važio za imućnog čovjeka koji je unatoč tome živio skromno, a svoj je život posvetio vjeri. Bavio se trgovinom i imao veliki autoritet. Kada je dobio ovaj važni zadatak, odmah se predao poslu. Lokaciju za izgradnju je tražio na lijevoj obali Miljacke i namjeravao je otkupiti zemlju na Bistriku. U



Fiat Fičo Fest na Baščaršiji

Na Baščaršiji je 29. jula održan Međunarodni Fiat-Fičo fest, povodom 62. rođendana ovog popularnog automobila. Na manifestaciju u Sarajevu pristiglo je 66 vozila, a najstarije koje je došlo je model iz 1957. godine.

